

दिनांक 02.02.2023

समय 18.45 बजे

- जोधपुर मांय जी-20 रोजगार कार्य समूह री मीटिंग सुरू व्ही- पैला दिन वैश्विक कौशल रा न्यारा-न्यारा पहलुआं रा बारा मांय समूह चर्चा राख्थी ज्यी।
- मुख्यमंत्री अशोक गहलोत विधानसभा मांय राज्यपाल रा अभिभाषण माथे व्ही बहस रो जवाब दीनो-सरकार री उपलब्धियां गिनाई।
- विश्व नम भूमि दिवस रे मौके आज प्रदेश मांय न्यारा-न्यारा जागरूकता कार्यक्रम राख्थी ज्यी।
- जग प्रसिद्ध मरु महोत्सव जैसलमेर जिला रा पोकरण मांय शोभायात्रा सागे सुरू व्हयो।

0000

जी-20 रोजगार कार्य समूह री तीन दिन री बैठक आज जोधपुर मांय सुरू व्ही। इण मांय आज श्रम अर रोजगार मंत्रालय री ओर ऊं "वैश्विक कौशल और योग्यता के सामंजस्य के लिए रणनीतियों की खोज और सामान्य कौशल वर्गीकरण के लिए एक रूपरेखा विकसित करना" मुद्दा माथे समूह चर्चा राख्थी ज्यी। इण री अध्यक्षता अर संचालन कौशल विकास अर उद्यमिता मंत्रालय रा सचिव अतुल कुमार तिवारी कीनी। पैनल मांय संबंधित हलकां रा खास जाणकार विचार जताया। आं मांय जी-20 देशां अर अतिथि देशां रा नुमाइन्दा शिरकत कीनी। समूह चर्चा पाछे कौशल विकास अर उद्यमिता मंत्रालय रा सचिव अतुल तिवारी खबरनवीसां ने बतायो के जी-20 समूह मांय विकसित अर विकासशील दोन्यू देश शामिल है। वे कह्यो के कौशल अर कामगारां रा बारा मांय दुनियाभर मांय एक फ्रेमवर्क बणावणो चाहिजे, ताकि कुशल कामगारां अर पूर्ति मांय एकरूपता लायी जा सके। तिवारी कह्यो के कामगारां सारू बेहतर माहौल बणावण अर वां सारू सामाजिक सुरक्षा रा बारा मांय ठोस काम बगत री मांग है। म्हाणा खबरनवीस बतायो के आवता दो दिन मांय वैश्विक कौशल सागे सामाजिक सुरक्षा रा मुद्दा माथे ई चर्चा व्हेला।

.....  
जलशक्ति मंत्री गजेंद्र सिंह शेखावत ई ई मीटिंग मांय शिरकत करण सारू जोधपुर पूग ग्या है। वे कह्यो के आ मीटिंग जोधपुर मांय व्हेवणी प्रदेश सारू भाग री बात है।

000

मुख्यमंत्री अशोक गहलोत कह्यो है के प्रदेश सकल घरेलू उत्पाद-जीडीपी रा मामला मांय देश मांय दूजी ठोड माथे आ ग्यो है। राज्यपाल रा अभिभाषण माथे विधानसभा मांय व्ही बहस रा जवाब मांय आज मुख्यमंत्री कह्यो के म्हाणी जीडीपी 11 फीसदी ने पार कर ग्यी है। वे कह्यो के राज्य सरकार लारला चार साल मांय 98 फीसदी बजट घोषणावां ऊं जुड्या कामां री मंजूरी जारी कर दीरीजी है। मुख्यमंत्री कह्यो के राज्य सरकार कोविड रा मुश्किल दौर पाछे ई बेहतरीन काम कीनो है। वे कह्यो के पेपर लीक मामलां रा आरोपितां ने सरकार जेल भेज्या है अर ऐडा लोगां रा माल-असबाब माथे ई शिकंजो कसी ज्यो है। इण ऊं पैली राज्यपाल रा अभिभाषण माथे बहस मांय शिरकत करता थकां सदन मांय विपक्ष रा नेता गुलाब चन्द कटारिया कह्यो के सरकार ।

किसानां रा कर्ज माफ करण रो झूठो वायदो कीनो। वे कह्यो के हाल ताई केवल सहकारी बैंकां ऊं ई काश्तकारां रा कर्ज माफ करी ज्यी है, जदके राष्ट्रीयकृत बैंकां कानी ऊं दिया ज्यी कर्ज चार साल निकळ्या पाछे ई माफ नी करी ज्यी है।

000

नागर विमानन मंत्री ज्योतिरादित्य सिंधिया आज वर्चुअल तरीका ऊं जयपुर अर जोधपुर बीचे नुवी हवाई सेवा रो उद्घाटन कीनो। ई मौके वे कह्यो के दुनिया मांय नागरिक उड्डयन हलका मांय भारत तीजो मोटो बाजार है। वे कह्यो के अंतर्राष्ट्रीय अर घरेलू प्लाइट ट्रैफिक रा मामला मांय भारत सातवीं ठोड माथे है।

.....  
सिंधिया कह्यो के ई सेवा ऊं लोगां री उम्मीदां पूरी व्हेवण सागे ई आ सेवा क्षेत्रीय पर्यटन, रोजगार सृजन अर कारोबार री बरकत मांय खास भूमिका निभावेला। ई मौके जल शक्ति मंत्री गजेंद्र सिंह शेखावत, नागर विमानन राज्य मंत्री जनरल वी.के. सिंह अर संस्कृति अर संसदीय कार्य राज्य मंत्री अर्जुनराम मेघवाल ई मौजूद हा।

000

राज्यपाल कलराज मिश्र जनजाति हलकां रा लोगां री जिन्दगी मांय सुधार सारू सगळा संबंधित महकमा ने मिल र काम करण बाबत् कह्यो है। राज्यपाल आज जयपुर मांय अनुसूचित क्षेत्र विकास योजनावां अर कामां री प्रगति री समीक्षा बैठक मांय बोल रह्या हा। राज्यपाल कह्यो के जनजातीय हलका रा लोगां ने समाज री

मुख्यधारा ऊं जोड़बा सारू संकल्प ले र काम करण री जरूरत है। वे कह्यो के आदिवासी हलकां मांय सैर-सपाटा री बेहतर संभावना है अर आं हलकां मांय सैर-सपाटा री ठोडां रो प्रचार कर्यो जावणो चाहिजे।

000

देश रा गांवाई हलकां मांय ग्यारह करोड़ पांच लाख ऊं बत्ता पिरवारां ने नळ रे जरिये मुहैया करायो जा रह्यो है। जल शक्ति राज्य मंत्री, प्रल्हाद सिंह पटेल आज लोकसभा मांय एक सवाल रा जवाब मांय आ जाणकारी दीनी। वे बतायो के सरकार साल 2024 ताई देश रा गांवाई हलकां मांय सगळा घरां मांय नळ रे जरिये पाणी पूगावण सारू जल जीवन मिशन चला रही है।

पटेल कह्यो के जल जीवन मिशन रो ऐलाण करण री बगत देश रा गांवाई हलकां मांय तीन करोड़ 23 लाख पिरवारां ने नळ रे जरिये पाणी मुहैया करायो जा रह्यो हो। वे बतायो के जल जीवन मिशन रा तैत हाल ताई सात करोड़ 81 लाख ऊं बत्ता अतिरिक्त ग्रामीण पिरवारां ने नळ रे जरिये पाणी मुहैया करावण सारू कनेकश दिया ज्या है।

000

आज विश्व आर्द्र यानि नम भूमि दिवस है। जैव विविधता ने बचावण मांय नम भूमि रा महत्व रा बारा मांय जाग जगावण सारू हर साल 2 फरवरी ने ओ दिन मनायो जावे है। सब ऊं पैली ईरान रा रामसर मांय वेटलैंड कन्वेंशन अपनायी ज्यो हो। ई कारण न्यारा-न्यारा देशां मांय नमी वाळा हलकां ने रामसर स्थल कह्या जावे है। भारत मांय 13 लाख हैक्टियर हलको नमी वाळो है अर देश मांय 75 रामसर ठोडां है। आं मांय राजस्थान मांय दो रामसर ठोडां भरतपुर रो केवलादेव राष्ट्रीय उद्यान अर जयपुर जिला री सांभर झील है। विश्व वेटलैंडस दिवस रे मौके भरतपुर रा राष्ट्रीय केवलादेव उद्यान मांय राख्यी ज्या कार्यक्रम मांय स्कूली बच्चां ने वेटलैंड री उपयोगिता री जाणकारी दीरीजी अर उद्यान रा सालिम अली व्याख्यान केंद्र माथे संगोष्ठी राख्यी ज्यी। ई मौके पर्यावरण ने बचावण अर वेटलैंडस री थीम ऊं जुडी चित्रकला, निबंध अर भाषण री होडां राख्यी ज्यी। ई मौके केवलादेव उद्यान ने प्लास्टिक मुक्त करण सारू सफाई अभियान चलायी ज्यो। बून्दी मांय जिला पर्यावरण समिति री ओर ऊं देव डूंगरी, बरधा बंधा कने अर गागोस मांय कार्यक्रम राख्यी ज्या। ई दौरान विद्यार्थियां सारू प्रश्नोत्तरी अर चित्रकला होड राख्यी ज्यी अर परिन्दां ने निरखण रो सत्र राख्यी ज्यो। सवाईमाधोपुर मांय पर्यावरण संरक्षण संगठनां री ओर न्यारा-न्यारा कार्यक्रम राख्यी ज्या। डूंगरपुर मांय वन मंडल अर जिला पर्यावरण समिति री ओर ऊं आर्द्रभूमि को पुनर्जीवित करना व पुनः स्थापित करना रा संकल्प सागे फलोज तालाब माथे कार्यक्रम राख्यी ज्या।

000

हाड़ौती अंचल रो खास पर्यटन अर सांस्कृतिक पर्व कोटा महोत्सव काल सारू व्हेला। तीन दिन रा ई महोत्सव रा तैत न्यारा-न्यारा आयोजन व्हेला। म्हाणा खबरनवीस बतायो के ई दफा ओ महोत्सव मोटा पैमाना माथे राख्यो जा रह्यो है।

000

जग प्रसिद्ध मरु महोत्सव आज जैसलमेर मांय सारू व्ह्यो। महोत्सव री सारूआत पोकरण मांय शोभायात्रा ऊं व्ही। केबिनेट मंत्री सालेह मोहम्मद अर जिला कलेक्टर महादेव मिन्दर मांय पूजा-अर्चना कर र शोभायात्रा ने हरी झंडी बता र रवाना कीना। मरु महोत्सव रा सिलसिला मांय पोकरण अर जिला मांय सैर-सपाटा री न्यारी-न्यारी ठोडां रोशनी करीजी है। मरु महोत्सव रे दौरान पांच फरवरी ताई देशी-परदेशी सैलानियां सारू न्यारी-न्यारी होडां राख्यी जा रही है।

000

अंतर्राष्ट्रीय मोटा अनाज वर्ष 2023 मांय मोटा अनाज रा प्रति जाग जगावण सारू आकाशवाणी समाचार जयपुर री ओर ऊं नुवी श्रृंखला चलायी ज्यी है। आप आकाशवाणी जयपुर रा व्हाट्सएप नंबर 9414052368 माथे संदेश भेज र रोजीना रा खाण-पीण मांय ज्वार, बाजरा सरीखा मोटा अनाज काम लेवण रा बारा मांय बता सको हो। आप संदेश रिकॉर्ड कर र या मांड र भेज सको हो। आं मांय ऊं कुछ संदेश समाचार बुलेटिन मांय प्रसारित कर्या जावेला। आज पेश है जोधपुर जिला रा शंकर लाल गोयल रो संदेश-

000

प्रदेश मांय सर्दी रो असर बण्योडो है अर प्रदेश रा केई हलकां मांय पारो और उतर्यो है। राज्य मांय सैर-सपाटा री ऐकली पहाड़ी ठोड माउंट आबू मांय न्यूनतम तापमान जमाव बिंदू माथे दर्ज करी ज्यो। मौसम विभाग रे मुजब चूरू मांय 3, करौली मांय साढे 3, भीलवाड़ा मांय 4 दशमलव 8, चित्तौड़गढ़ मांय 5 दशमलव 4,

अजमेर मांय 7 दशमलव 3, बूंदी मांय 7 दशमलव 6 अर राजधानी जयपुर मांय 8 दशमलव 4 डिग्री सेल्सियस न्यूनतम तापमान दर्ज करी ज्यो। मौसम विभाग आवता दिनां राज्य मांय मौसम सूखो रेहवण रा आसार जताया है।

000

राज्य स्तर री दिव्यांग एथलेटिक्स होड आज अलवर मांय सरू व्ही। पैरा स्पोर्ट्स एसोसिएशन ऑफ राजस्थान री ओर ऊं राखी जा रही ई होड रो उद्घाटन जिला प्रमुख बलबीर सिंह छिल्लर कीनो। होडां मांय कोई नौ सौ पैरा एथलेटिक्स शिरकत कर रह्या है।

000